

四庫全書

史部

欽定四庫全書

桂勝卷二

明 張鳴鳳 撰

七星山

渡江而東則有七星峯駢岫列高視近野羣山莫與
並然亦以有諸巖洞冷水出其東栖霞出其西又有
玄風彈丸爲栖霞左右掖南則龍隱雖小隔越諸峯
迴映連綴狀斗故曰七星彈丸溪水流經山前冷水

亦自有泉橫貫其中以曾相國布梁水上故巖一名
曰曾公栖霞相傳名起自唐宋改爲仙李巖玄風則
陰飈從洞出坐者忘暑彈丸本以溪石圓轉名之而
其他煙堂霧室半出空中道絕不可攀窺者有七八
處若在地上列炬可入火光所及瑋怪觸目不可勝
數雖積乳所鍾巧踰雕畫孰爲此者造物人謀鬼謀
烏可效乎惜不遭班張左潘覩靈祕發盛藻賦之以
傳而徒得鬼瑣如宋以來載筆者能無慨哉非此又

無所錄龍隱特起故別之

栖霞 唐祀玄元於此故名玄元栖霞洞傳聞洞前有唐慶林觀又曰東觀

風土記云東觀在府郭三里隔長河其東南皆崇山巨壑綠竹青松峒崆幽奇登臨險易不可名狀有石門闕之狀而隘秉燭行五十步有洞穴坦平如

毬場可容千百人如此者八九所約畧相似皆有清泉淥水乳液葩漿怪石嵌空龍盤虎踞引燭緣涉竟

日而還終莫能際相傳云昔有人好泉石多束花果
裹糧深涉而行還計其所行已及東河之下如聞棹
檝湍湍之聲在其上又山外高峯舊有亭臺近已摧
壞

虞衡志云栖霞洞在七星山七星山者七峯位置如
北斗又一小峯在旁曰輔星石洞在山半腹入石門
下行百餘級得平地可坐數十人旁有兩路其一西
行兩壁石液凝沍玉雪晶瑩頂高數十丈路濶亦三

四大如行通衢中頓足曳杖鏗然有聲如鼓鐘聲蓋
洞之下又有洞焉半里過大壑不可進一路北行俯
樓而入數步則寬廣兩旁十許大鍾乳垂下纍纍凡
乳狀必因石脉而出自頑石出也進里餘所見益
奇入行食頃則多歧遊者恐迷途不敢進云通九疑
山也

詩

唐從事盧順之於東觀席上贈張侍郎

金匱山人集 卷二
渡江旌旆動魚龍
令節開筵上碧峯
翡翠巢低巖桂小
茱萸房濕露香濃
白雲郊外無塵事
黃菊筵中盡醉容
好是謝公高興處
夕陽歸騎出疎松

張侍郎固和

亂山青翠郡城東
爽節憑高一望通

交友會時絲管合
羽觴飛處笑言同
金英耀彩晴雲外
玉樹凝霜暮雨中
高詠已勞潘岳思
醉歡慙道自車公

張

闕

遊東觀

巖岫碧孱顏
靈蹤若可攀
樓臺烟靄

外松竹翠微間玉液寒深洞秋光秀遠山憑君指歸
路何處是人寰

宋孫覲 十載汙脩門簪橐侍帝垣五雲深莫窺衆
星拱以繁一坐犢背書身落海上村山川發餘想鐘
鼓眩昔聞星圖煥斗極兩兩錯地文今夕復何夕乘
槎造天閭日月豈可挾參井定足捫誰能揭其柄爲
我酌瀛樽

呂愿忠 郊原同按轡杖屨陟青冥山色混林樾溪

光照斗星

闕

峯高插戟兔徑曲穿庭

闕

一聲遠千

巖特地青

張孝祥登七星山賦呈提刑仲欽

魁杓歷歷控雲

嵐地闊天虛萬象涵不與天公管喉舌猶堪嶽立鎮

湘南

張維次經畧舍人韻

列岫凌虛涵翠嵐龍泓澄澈

七星涵巖瞻好向西湖著飛去何妨自嶺南

張自明

玉洞沉沉鎖碧虛月華曾伴日華居刀圭

影觸金丸彈蟬蛻形留錦鯉魚舊隱已荒三逕草仙人忽授數行書丹霞自有栖真處十里風松可跨驢

羅大經從趙季仁遊洞作瑰奇恣搜討

以下
原闕

范成大碧虛亭銘并序 唐鄭冠卿遇日華月華君
於栖霞之洞與之笛不能成聲傾壺酒飲之僅得滴

瀝獨記其贈詩二篇出門見二樵者問曰洞中樂乎
跬步亦失所在吳人范成大小築其處以識幽討按
詩卒章云不緣過去行方便那得今朝會碧虛即以
扁榜且銘之巖壁銘曰空洞維石中函碧虛誰歟知
津有翹負芻我來扣門兩翁在否雖不能笛能醉君
酒為君作亭表巖之扁名翁所命而我銘之

題名

河間俞獻可上谷燕肅趙郡李誥聖宋天禧二年秋

月中元同游

皇宋慶厯四年甲申九月二十三日辛巳廣南西路
提點刑獄尚書虞部郎中隴右李永德尚書職方員
外郎知桂州汝南周騃尚書都官員外郎新知永州
蔡陽潘衡轉運判官太常博士安定梁戴

曹聖延李端臣躡雲磴摩星魁倚筇少憩於此丁酉
七夕前三日

經畧安撫蔡懌樂道提點刑獄尚用之仲明廉訪使

者張洵仁仲宣和甲辰八月初八日同游

紹興六年丙辰歲上九日八桂龍躍并宛丘唐全同
判仙李記到此因而刻題

方城張淵道晉陽路質夫贛州曾吉甫桐廬方務德
潮陽劉方明紹興戊辰六月丁酉同登七星山

紹興丁丑正月己巳府縣官屬汝陰張好禮定叔開
封李裔元傳之睢陽王處存子安洛陽楚偃師言長
沙吳延年永錫壽春魏美言季及溫海戴子琦君美

清江揚解正伯休務相從尋春於訾家洲訪程公巖
入栖霞洞憩於黃氏之園極一時觀遊之勝繼至者
二人開封賈戒之公戒柯山陳梁伯初

余素有山水癖游宦江浙逾二紀明峯繡川歷覽幾
盡飽聞八桂巖洞之奇恨未能一到得郡鬱林因携
家謁清惠祠泛舟過龍隱食已由曾公巖入栖霞洞
闕窈窕數里不能極其涯既出相羊石扉宴坐終
日有野雲飄素練羣峯錯蒼壁超然頓忘俗慮信壺

中有天語非虛誕又疑飛空步霧乘風駕鶴而來想
仙島蓬宮不異此也隆興初元七月十七日三槐王
定甫之書會稽諸葛國瑞永嘉林騰達偕行

乾道癸巳重九吳人章潭遽道范成大至能携家同
登七星山遂遊栖霞水月諸洞

鄭少融趙養民李正之范至能遊壺天觀還會碧虛
淳熙元年

范至能赴成都率祝元將王中顯游子明林行輔周

直夫諸國叔時酌別碧虛淳熙乙未二月八日

增城崔公正子被旨奏事以癸酉上春下泝舟行先
一日括蒼管定夫濟陽李誠之會飲於湘南樓已而
遊屏風彈子巖栖霞洞泛舟龍隱歸集於翛然亭時
積雨新霽風月較美清流碧巘隨處莫不呈獻特爲
公妍黃童白叟夾道相與咨嗟深惜公去蓋公持憲
甫朞年而行部之日居半未嘗足歷巖洞及茲召行
肯爲一日留酒行加嘆曰天下巖壑稱誦此地誠亦

希有人生臭味投合此會良未易得景物與人情覺
相愛戀此意尤難忘其爲我鏡此語於巖石他日以
墨刻寄似亦足以慰所思云故書

莆田方信孺

闕

嘉會七星山嘉定

闕

陽月來

呂偉信留桂林五月凡山水之勝無不登覽於其行
也蔡顏仲具酒率韓弼時蔣商澤同遊以別之陰風
淒涼倍有離羣之念癸卯九月二十日

淳祐辛丑六月二十一日昭武謝達叔達金華劉泳

清叔臨川羅愚季能遊

江右蕭澥曹朋年周復明曾遊

萬必達淳熙改元仲秋九日獨步壺天觀回憩碧虛
伏讀鄭君事蹟長嘆二真景昔時之集今獨何異於
愚也敬書

洞有李彌大仙李巖三大字

洞門上有方信孺遊四大篆字又有小書嘉定甲戌
七月既刻於栖霞洞

玄風洞

虞衡志云洞去栖霞旁數百步風自洞中出寒如冰

雪

詩

宋曹輔同歐陽晦夫邂逅遊風洞 一水羣峯翠若
堆洞天終日鼓風雷每懷絕境超然處却與幽人偶
爾來

李彥弼與曹聖延遊風洞及七星觀長句 文英子

建聲華烜少陵嘗詠波瀾濶遐流疊疊鍾宜春觀君
紫芝真秀拔華山騷耳汗血孫奚取王良手芻秣駸
駸凌厲追遺風胡爲頓纓馳駘越誰嗟長庚有老裔
壯齡直欲排紫闥初從附鳳矯飛翔晚乃射虎耽疎
豁強顏方喜安斗筭分何能塊圭撮胷中琳琅第
埃塽自慙鈇鋒乏一割時過西鄰斬發藥雷引玉泉
澆膝渴新商執矩蚤威令甘靈騰虛推虐魃約君飄
鳬泛滄猗背負青天

闕

天闕風來空穴襲髮毛刷腋

涼飈振絺葛冷然便擬列子遊不待別起青蘋末徐
躋七星趾山椒杓魁觔觔狀旋斡近君白雪熱何有
高談一激錐囊脫扳肩作者古蹊徑餘事篇章隨擊
鉢盤跌不減二華君妙閱枯槁戰挑掄光騶搖縱莫
可留四序翩翩幾箭筈頃看金柳流鶯鳴俄聽玉露
叢蟬聒清輝默韻無絃琴烏用檀槽揮一抹我方騷
愁愁到骨潛睨蠹蟬眉目緜徒操詩窮擁鼻吟闕或
酒酣將月喝生平剛腸久已屈賴爾匹夫難志奪故

交紛紜翺赤霄大鈞播物昭窮達德尊一代元坎壈
儒腐百年決麤糲南溟垂翅雲翼收北窓點卧霜鬚
捋病馬猶期春草長涸魚終需江水活君行趨覲長
安日軼興橫秋疇可遏公卿傾風定援手鴻造機緘
由一撥江湖要作迴相忘靜言可笑相濡沫

趙夔 青嶂橫開高幾重巉巖直上半天中虛明洞
口千年久澄澈流來一溜通海蚌張頤方吸月雲龍
奮跡遂乘風隼旗出有隨軒雨指日秋成賀歲豐

張孝祥 山入烏蠻連越巂天開斗野對珠宮應憐
桂海長炎熱乞與清涼萬竅風

文

宋柳開銘并序 出桂城東抵慶林觀背山下有洞
出風淳化元年開知州事往避秋暑因刻銘於洞銘
曰桂東叢峯洞穴空通淒肌森襟沒骨浸心瑩雪若
潔凝冰若冽暑宇如燠周陬流毒其何如斯爲能去
之嶺山我我嶺水湯湯亘古綿今氣炎土荒物爽爾

情候乖朔節夏雨多涼秋旱多熱春裘冬扇朝順夕
變反側無恒天癘相仍我來洞中百慮時窮脩然自
釋忘歸終日勒銘巖石用紀罔極

題名

程節信叔張景溫敦直董遵守道許端臣中甫元符
三年五月十九日遊

政和壬辰季秋丙子經畧安撫使王先之邀轉運副
使陳道夫提點刑獄唐夢傳提舉學事陳質夫提舉

常平陳從道走馬承受陳明遠轉運判官唐晉德蚤
集東禪寺飯於安樂堂煎茶少憩遂過風洞

宜春曹邁聖延廬陵李彥弼端臣凌商衡絕湍桴挾
隨車之霧潤探空穴之薄膚於是乚雲子甌酪奴討
文園之菁英研道樞之虛無恍契夫禦寇之冷然歟
翺乎寥陽之清都政和七載丁酉七月上澣日李昂
霄奉命書

來風亭落成少隱置酒會者幾人立道景淵令升汝

弼仲益紹興甲寅七月十一日

彈丸山宋人名其巖曰彈子今曰闕

水經云灘水又南合彈丸溪水出於彈丸山

詩

朱晞顏 傷弓枉木謾猜嫌巖石稜稜彈樣圓鵑鵲
橫空秋凜凜鳬鷗渡水晚翩翩私心灰冷慵思綴蹇
步塵勞不受鞭挾彈張弓付年少歸歟趁取菊花天
宋陳瓘 地迥山奇怪神仙喜穴居百雲剡洞巧五

石補天餘商野幽人夢周南太史書心乎愛丘壑勝
槩一躊躇

徐夢莘與鄉人宴集巖中作 吾儕生江南遠近且
隣鄉一官皆爲貧餬口走四方遇合良獨難動如參
與商誰知自有時朋盍聚炎荒外臺叅計畫幕府佐
紀綱出宰得壯縣司教涖郡庠曹掾勝三語簿領真
仇香不止似

以下
原闕

江西鄉人同仕於廣右者十有二李蹊成叔郭有憑
充誠潘修文叔李石韞玉徐夢華商老王璟李文張
坦明仲蔡詵子羽陳公璟師宋魏沐熏父王思詠詠
之孟浩養直淳熙重光赤奮若仲秋中澣講鄉會於
湘南樓過彈子巖題石

淳熙九年歲在壬寅暮秋初吉七閩熊飛景瞻以憲

事行部至桂林與鄉人宦游者李暮東暉李櫚伯廣
王葵欽之陳閱周卿上官駿子聲鄧夏卿仲華吳三
錫寵卿吳榮漢老楊延季洪卿陳璧珪鄭霆希聲
潘元震子聲陳光祖昭遠吳孝友次張趙冲虛中莊
漢輔季良蔣孟震震卿朱木仁叔陳鷹定夫曾於諸
洞以賡庚子之盟與者濮陽馬演季長青社鎬良弼
傅鳳臨川蔡詵子羽

桐廬詹體仁三山林惠隅遊龍隱曾公栖霞彈子諸

巖洞天霽氣和徜徉終日第憲車行部不得同此樂
也淳熙乙巳正月巾幘

莆陽陳讜正仲自三城辟守懷澤就銓計臺仲子璉
侍行臺府賓佐移尊水東盤薄松關歷覽魯公栖霞
彈子諸巖洞同游者十二人北嶽王宗孟景醇泉山
趙庚叔初林子蒙亨仲廣平李正夫頤老廬陵董世
儀子羽建安鄭繼勳少周劉襄伯寵臨川楊汝明仲
藻西安徐詡叔虞金華朱甡茂叔新安朱權聖與長

沙李魯玉伯溫時連雨留霽寒氣亦歛景物呈露極
驩乃歸慶元改元冬十一月二十有六日

開禧改元季冬中澣東都趙善基作肅領兒曹汝冽
汝瀧汝湜汝渲來遊婿昭武謝寧孫鄧友直外孫謝

濟鄧筠侍行後一年清明前

以下
原闕

7. 10. 11.

10

陸家

+

曾布和 從事區區厭獨賢尋幽深入翠微間旋開

榛莽東郊路偶得神仙舊隱山都嶠三天臨瘴水靈
巖十里接溪蠻何如咫尺隣風穴杖屨時時一往還
苗時中紅旆尋幽東郭旁泉巖新得冠殊方一川
氣象天開作萬古荆榛地蔽藏崖穴乍驚堂室闕榜
名知與日星長異時人指溪橋水思愛還同召伯棠
劉宗傑謝公高興在東山尋得仙巖郡邑邊萬朶
連峯凝碧乳一溪鳴玉逗寒泉由來物外無塵景須
信壺中有洞天嶺服已安褻詔近莫將歸夢更留連

彭次雲 日擊烟霞畫卷舒披榛敲石得蓬壺洞天
日月千年久人世塵埃一點無靈藥難尋雲縹緲落
花不見水縈紆使君鳳閣翱翔近謾與東山作畫圖
齊謔 天作地藏知幾年公來因得茂林間誰言物
外真仙境祗接人居近郭山石乳望中蒼玉墜泉源
深處卧龍閒行看再爲蒼生起乘興從容重返還
劉誼 尋得新巖冠一州使君從此作遨頭千年草
莽埋幽致今日衣冠成勝遊洞穴已能驚俗眼神仙

須合隱浮丘主人將爲商霖起還許微官卜築不
揚損賦呈經畧龍圖曾公 陽巖高敞納晨曦鶴駕
雲輶或可期神物雕鐫元入妙人工開闢更增奇須
知水石清涼處絕勝塵沙熱惱時紅旆碧幢勞小駐
多慙主客濫追隨

尚用之和 當暑都忘畏赫曦遊觀邂逅得心期咸
其自爾從天造賁以人爲特地奇風露乍涼秋至後
林巒散影月明時朱轡好事留住佳客大醉高人許鎮

隨

孫覲 羣峰倚天立萬馬屹不動風欹紫玉珂雨暗
青絲鞵相君千里目渺渺孤鴻送披雲覲天功鑿翠
出巖洞中空貫長虹側立鄩天甕宛宛卧石梁欲起
特地控玉棺已上天甘棠有餘誦獨餘澗底泉時與
幽人共

李彥弼 嵌竇栖霞翫翫轉杓左驂鸞翼右耳鳳簫
與排酷烈境邈氛囂靜者多妙於焉消搖

張金 欲訪真仙小有天路窮崖絕俯靈泉相君聊
試濟川手翳鳳駉鸞盡有緣

文

宋劉誼記 元豐元年冬交人入貢上方擇人處置
事乃詔魯公自廣州移帥桂府二年南方無事民和
歲豐公以其餘暇訪尋桂之山水奇勝處一日率郡
僚遊所謂風洞者縱步而東行得一巖於榛莽間巖
之前有石爲之門屈曲而入則流水橫其中碧乳垂

其上周環而視其狀如雕鐫刻鏤殆出於鬼工而不類於融結者也公於是拂石求前人之跡則未嘗至者焉乃構長橋跨中流而渡以爲遊觀宴休之處且與衆共樂之自是州人士女大夫四方之人無日而不來其巖遂爲桂林絕觀夫桂之洞穴最多南而白龍北有石門迴穴據其東隱山在其西皆唐名流之所嘗遊也觀其咏歌序刻莫不極道其勝槩而嘆前人之所遺者斯巖之景亦冠絕矣而乃獨遺之是真

可歎也已豈當時忽於尋訪而不見耶將唐人所謂
天作而地設之必得於子之多顯耶余生長東吳號
爲山水窟中如天台雁蕩最爲奇觀然未有過此者
也邦人樂公之德政而願以曾公名其巖以比甘棠
之思余故爲書之且以告後人收入爲圖經盛事云
公名布字子宣其年九月二十六日管勾本路常平
前江山縣丞劉誼記

題名

元豐三年十二月初五日權本路轉運使朝散大夫
直集賢院陳倩君美權荆湖南路轉運使朝奉郎直
集賢院朱初平仲隱權發遣提舉本路常平等事光
祿寺丞劉誼父同遊

盧約潛禮胡田耕道劉川子至胡義茂修方樓禹隣
元弼葉世隆振鄉閭淳質夫傳諒友冲益方元哲允
迪紹聖乙亥初偕遊

朝請大夫直龍圖閣知桂州兼安撫經畧胡宗回醇

夫朝奉大夫轉運副使程節信叔朝奉郎提點刑獄
曹輔子方朝請郎轉運判官程遵彥之邵承議郎提
舉常平徐常彥和紹聖乙亥季冬甲辰同遊

轉運判官周元吉寵遷近部副使唐夢傳餞別遊此
提舉學事戴質夫提舉常平陳從道預焉大觀四年
六月十八日權知州事張莊正民題時自妙樂來從
風洞轉魁龍隱江歸

先之道夫夢傳質夫從道明遠進德政和壬辰歲季

秋丙子日自風洞來遊曾公巖清坐良久遂過龍隱
經畧安撫蔡懌樂道提點刑獄尚用之仲明廉訪使
者張洵仁仲宣和甲辰八月初八日同游

湘陰彭子民彥修建安劉川子至西安留怙彥強洛
陽席貢叔獻同遊曾公巖元符戊寅九月二十五日
庚午題

經畧安撫劉彥適轉運副使陳充提點刑獄董莽轉
運判官趙子巖富陽故侯孫覲紹興四年七月十二

日同遊

番陽汪恪義安劉文桐廬方洪紹興戊辰六月二十
有八日同遊

方城張淵道晉陽路質夫贛州曾吉甫桐廬方務德
潮陽劉方明同遊曾公巖紹興戊辰六月丁酉

唐逢堯趙周材劉時舉方稚川王公休汪聖錫紹興
辛未二月二日同遊

淳熙五年廣漢張拭敬夫時以閏六月朔旦北歸湖

湘前三日與長安周椿伯壽來遊水東諸巖以致其
欲去之意賓客相追尋於山間者陽武万俟立中不
倚建安黃德琬廷瑞八桂張仲宇德儀蔣礪良弼唐
弼公佐李化南夫延平張士侏子真邯鄲劉乘晉伯
長沙李揆起宗吳獵德夫宜春李逢源造道東萊呂
修年永叔

淳熙辛丑立秋後一日括蒼梁次張拉清江徐商老
浚儀邢之美延平張子真柯山李伯寅來遊當暑而

寒劇飲不醉

蔣子明王千秋謝長卿紹熙二年六月晦日來遊
鄭子壽倅清湘總檄過八桂妖山別行以嘉定己巳
之朔旦偕前邵陽令三山江信之來遊

潮陽鍾大鳴赴廣東運司進士試莆田方信孺約同
訪堯山歸路過曾程二巖酌別於龍隱來日遂行玉
笥山道士胡佺平偕至嘉定八年六月晦

嘉熙己亥重九日帥守建安徐清叟直翁繡使稽山

黃自明明仲同遊

癸丑十月十七日丘仁叟譚雄飛裴夢貺同遊

高陽許慶元善弘農楊禹圭君寶辛巳歲季春念九
日同遊男許珪侍行謹題

華陰楊損益老來自都城觀桂林山水奇秀歎未嘗
見江都尚安國長卿於是拉金華姚弼中文發寵弟
充國翁卿定國曼卿宅相楊俊彥周輔相與徧遊巖
洞登超然過八桂升雉山探風穴入栖霞捫七星濯

纓於伏波烹茶於靈隱酌酒魯公巖中泛舟妙樂堂
下自戊申至庚戌凡三日而後歷覽物外勝遊一段
佳事也宣和七年歲次乙巳夏六月初十日書

灘山人曰桂諸近山七星爲冠栖霞宵遽與人世隔
故唐人比之仙庭如所云日月兩華君世寧有之哉
猶燕秦方士談海中三神山者卒莫至其下雖涉夸
誕然是山之勝不可誣也故尹穡仙蹟記輒剝去之
其銘特以清警存李文光楊眉孫真聖殿全真觀記

於攢峯列壑不少光贊反爲羽流張其土木何以觀焉圖經故傳是山慶林觀以有瑞石告唐長世之符至遣李衛國靖就視之事有無不足辨而衛國爲大使安撫嶺外唐書紀之明甚頃循彈丸溪行見溪旁石壁刻有唐桂州都總管使李衛國公廟天福二年加封靈顯王字心儀其廟當在是地祠未經挂之伏波與祠衛國不更有顯據哉厥壁嶢嶢上出白雲下鏡清溪留眺良久目眴意迷憶往期友人故中尉經

盍挈卧具壁下冀覩竟日霞洞函其奇彈壁挺其秀
足令千山望風自失其惟七星乎

龍隱山

七星迴映並薄青旻惟龍隱分道宅南自表宜以巖
名建山之號云或曰龍影以龍去影存游者刺舟轉
碕入竇見其上石裂長數丈作鱗甲形登岸緣麓則
有大巖如排高門坐堂皇可以廣宴或題曰龍騰謂
龍已絕地上飛

關

右亦有巖曰月牙狀月之初乃

騰隱兩巖列坐則丹曜減焰引舟則玄壑生涼用消
夏爲快不似諸空洞來風或中人也騰巖又有滴玉
泉泉從山椒點點墮石穴琤然作清響宋人來游酌
石溜試新茗即此中故有釋迦寺環翠驂鸞兩閣又
有兩華堂或曰驂鸞乃宋范公成大亭或仍閣之名
范又有驂鸞記記自吳入桂道里所歷亭廢續建後
更名曰怡雲即故亭地宋游最盛鐫題之衆至環兩
巖使壁無完石他巖未之有也

虞衡志云龍隱巖在七星山脚沒江水中泛舟至石
壁下有洞門高可百丈鼓櫂而入仰觀洞頂有龍
跡天矯若印泥然其長竟洞舟行僅一箭許有洞門
可出巖在洞側山半有小寺即巖爲佛堂不復屋焉

詩

宋李師中 過江緣磴尋溪根隱然絕壁天開門傳
云此處有龍隱陰巖凜凜猶疑存風雲已與時變合
苔蘚尚蝕初潜痕嗟予出處不自重遇事輕發難爲

神

又有序 師中嘉祐三年九月受命來嶺外七年十一月得請知濟州感恩顧已喜不自勝留詩四章以志歲月今錄其後二首

乞得衰身出瘴烟一麾仍許視于蕃
家園在望松楸近自問如何報上恩

出岫白雲猶繚繞離羣飛鳥尚鳴悲
四年人去豈無恨況是梅花滿樹時

張田 龍隱晦其時莫考龍驤挈攬跡堪驚孔明久
卧養全德老子忽飛歸太清溪上一天常氣勝洞中
六月自寒生至神不得無情處甘澤年年灑百城

治平四年六月題後四十七年政和甲午三月孫
修武郎光祖重書上石

轉運使太常少卿章峴 吏局區區得暇難倚崖高
閣暫登攀羣峯半出重林外小艇橫浮一水間霜葉
信風隨鳥逝晚雲沉石伴僧閒夕陽欲下猶迴戀更

鼓清琴數弄還

又丁未上巳重遊

溪干艤棹訪巖扉危磴攀緣不

欲歸垂乳滴聲當佛座宿雲留潤在僧衣聊開襖席
臨流水閒擲文竿到落暉旅宦天涯甘寂寞送春無
意惜芳菲

又留題龍隱巖

碧崖石室俯清漣蟠蛰靈虬不記

年委蛺去爲天下雨抱珠歸作洞中眠照開霧脚澄
溪月滴破雲根暗穴泉負郭勝遊雖信美桑間留愛

我無緣

熙寧戊申仲秋二十六日刻於崖壁男凝書

張澂 桂嶺摩天濺波經地兩磅礴盡石之變窮神
之祕禹所鑿故其高者峭拔排空礪矛槩而其下者
宏曠洞達侔觀閣瞻彼龍巖穹窿龍從跨寥廓發地
百尺蜿蜒躡蹠勢拏攫騎風乘雲去爲膏澤起焦涸
或爲至人老子孔明世程鑿結融肖像綵介朱鬣宛
如昨風醒雨澁森然向人恐遂躍豢龍不官孔甲劉

累失其學亦復舞湫號蚓生物困陵輾我昔笠澤覽
觀湖海天一握正見神物下飲濤波醺澆潏蒼鱗修
尾其大環臂烟霧薄須臾上征疾雷迅雨間飛電自
喜壯觀光絕後前邈霄垓豈知白首炎陬水石窮脉
絡雄姿偉態摩挲沈歎窘揚摧潭湫涵澹尚其來游
醉拚爆山空月寒風露凄然誰與樂却視陳迹感歎
陵谷貽以愕我作銘詩贅牙叟惜媿灝噩琢之嵌巖
日月齊光萬古託

許子紹留題龍隱巖 矯首初來北斗峯直穿山腹
作玲瓏石間蛻骨痕猶在淵底藏珠水更通霖雨幾
年巖野去卧龍何處草廬空眼中要識真英物寫跡
無勞想下風 淳熙改元重九男升之侍

朱晞顏詩四首錄其二

遊壺天觀泛舟過龍隱洞小酌至月上乃歸
浪道湘南是瘴鄉玉壺銀闕四時涼卧龍不起葭灰
動愛日空驚繡縷長浮蟻且同佳節醉探梅不作少

年狂暮歸慙愧山頭月照我駸駸兩髻霜

又暇日過龍隱山有以千葉白梅獻者輒成鄙句

素艷重重疊雪輕先春不怕雪霜凝人言五嶺地皆

熱誰折一枝寒欲冰似笑踈花太孤瘦故教密葉擁

千層湘南別有新春樣拚醉花前喚不應 同時胡

寺丞劉教授和梅詩以不及朱故不錄

張金 何年此地蟄飛龍石壁蜿蜒尚有蹤爲報龍

公莫貪睡郡人于爾卜豐凶

張叔信後有小序 幾年鱗甲蟄清淵一旦飛騰石
自穿遺跡漫存離舊隱定應銜雨去朝天

又 洞口巖高著數椽湫靈聽法護金仙騰身一躍
天池後雲霧于今尚瀟然

番陽銀峯張叔信慶元戊午季春上澣偶因暇日携
家尋勝巖洞固多而此尤絕豈非神剏地設者耶聊
書二絕以紀其異同遊鄉儔余儼季莊汪邁養浩

方信孺 春波飽微綠斗柄函空明方舟貫巖腹鵝

鵲相酬鳴仰窺穹窿頂宛轉百怪呈僅餘鱗甲碎不
見頭角擥下闕清冷淵演迤萬頃澄但同魚鳥參勿
遣蛟龍驚抉苔撫奇篆倚棹看題名三將標殊勲自
與山不傾誰歟贅小築政恐山靈嗔南洞更幽絕仙
佛依崢嶸太虛可爲室豈復資藥楸乳泉助茗椀中
有水雪清何須驂鸞去此即白玉京鼎來不速客抱
琴忽逢迎愛此無絃曲崖溜同一聲爲君洗塵耳喚
我詩魂醒祗愁白衣到好句無繇成

又石門元不鎖巖屋本無基
九夏花猶在千年樹倒垂
僧閒方定起客到每歸遲
甚欲眠蓬葉沿崖續

斷碑

又曾榜武夷九曲何如挂嶺
七星水石小容

闕

烟雲長帶龍腥

又愛山邨惜走千回生怕前驅
後騎催石上參差鱗甲動
眼中在處畫圖開
驂鸞未辦乘風去
浮鷁何妨載雨來
人事百年俱變滅
祇應題字不塵埃

雨脚初收魚尾霞滿溪流水半溪花尋源曾識武陵
洞泛宅如浮苔水家但得嵌空元有路何如峭絕不
容車道人辛苦經雲水成塔從來是劫沙

無名氏 翠壁凌雲聳禪扉向水開巖高隱靈跡地
勝隔囂埃瀑影簷前落江聲檻外來斜陽無限景歸
意幾徘徊

又 絕頂敞靈洞危空竇榻開層軒飛瀑布幽徑出
氛埃炎暑先秋去嵐光向晚來忘機聊一息鷗鳥共

徘徊

又七言絕句一首 亂峯凝碧闢巔岼曾有神龍此
蟄蟠靈物已興甘澤去高巖依舊插雲端

題名

尚書外郎熊同文侍禁閣門祇候王貞白殿中侍御
史俞獻可大中祥符五年九月九日同來獻可書

廣南西路體量安撫使副余靖安道漕副熊文友經
畧安撫蕭固幹臣轉運使宋咸貫之兵馬鈐轄柳涉

公濟提點刑獄李師中誠之馬仲方子正通判黃照
晦甫是日遊風洞栖霞洞遂遊此嘉祐五年十月晦
大宋治平元年仲冬二十七日同轉運判官孔延之
長源前安撫司勾當公事姚原道彥聖新知龔州丁
錚帶聲自壽寧院抵慶林觀少休風洞上登栖霞洞
却下漾檝泊龍隱巖行觴嘯詠日薄西渡提點刑獄
余藻質夫因書遊覽之勝刻於崖石

經臣張覲執中劉彛志康傅燮熙寧甲寅六月八日

同尋回穴山飯於是巖酌石乳之溜試闕源新芽香
色相得皆絕歎賞數四遂同舟以遊風洞

權發遣轉運使尚書屯田郎中直集賢院張頴副使
殿中丞苗時中提點刑獄太常博士劉宗傑管勾常
平前江山丞劉誼元豐元年八月二十四日遊龍巖
起居舍人龍圖閣待制知桂州兼廣西經畧安撫使
曾布權發遣轉運使尚書度支郎中直集賢院陳倩
權副使殿中丞苗時中權發遣提點刑獄太常博士

劉宗傑權發遣提舉常平秘書丞齊諶管勾常平前
江山縣丞劉誼元豐二年二月十日遊迴穴

南豐曾布已未上巳盡室經日歷覽東觀巖

以下
原闕

壽之赴官合浦道出桂林遊龍隱巖伏觀先君經畧
龍圖留題不勝悲戚元符二年九月旦日第三男供
備庫副使新差廣南西路兵馬都監兼知廉州軍州
事張壽之謹記

新定許端卿中甫雅有巖洞之好被召歸刑曹鄱陽
程節信叔歷陽張景溫敦直全魏董遵守道酌別於
此而中甫眷眷有惜去之意元符庚辰五月十九日
題

鄱陽程節曲江譚挾臨川劉蒙全魏董遵廬陵曾正
建中靖國元年寒食日同遊

天下洞類多幽陰或遠水清韻不足龍隱巖高而明
虛而有容復臨深溪大槩似碧落洞

以下
原闕

卷之三



桂勝

三

卷之四

桂勝

三九



唐逢堯趙周材汪聖錫劉時舉王公休方稚川紹興

辛未六月二日同遊

後五十一年紹興丙子十月初五日轉運判官王孝
先來遊恭覩先公經畧尚書舊誌驚歲月之逝想風
木之悲揮涕而書謹勒諸石

開封蔣公被旨廣西幹事因遊諸洞至此少憇建武劉
文舉偕行改元隆興季秋初七日命侄存思書於石

七閩孫師聖黃壽之江清卿脩卿陳啓宗黃升卿張
子真子斐王公左謝少魏乾道丁亥六月上休自七
星聯鑣過程公巖小集龍隱泛舟由朝陽以歸師聖

子德卿壽之子希呂侍行

金華朱紱永嘉周去非直夫豫章簡世傑伯俊西洛
王子煜晦叔廣漢張杓定叟定叟之甥甘奕可大來
遊壬辰三月晦

淳熙十三年冬十月己亥桐廬詹儀之開封王寅祖
姑蘇孫詔遠職事之餘來遊龍隱是日大風重裘不
煖俯仰久之至骨爲聳

淳熙己酉中元日李景淳徐體仁劉益仁來遊龍隱

巖樂水石之勝徜徉久之

桂林巖洞龍隱其最也下有潭泓澄縈紆貫於巖腹
世傳昔有龍蟠伏其間因以名焉公餘同廬陵曾天
若嫠女呂祖平新淦董世儀建安劉源來遊得二十
八字紹熙改元十月吉日新安朱晞顏

慶元戊午正月八日集松關之脩然亭既而拏扁舟
延緣過龍隱爲水石更酌及暮登新橋以歸董世儀
子羽王琨德貢熊思遜謙甫呂大信不約曾三畏無

過武居仁榮叔王琳子休饒祖堯述古楊相魏翁劉

龜習季占揚

以下
原闕

次定四庫全書



桂勝

三

嘉熙戊戌歲七月癸未龍溪顏頤仲景正邀長沙鍾
震春伯登湘南樓過脩然亭浮灘江訪龍隱窮栖霞
冷水諸洞之勝羽觴滿引角巾相羊時以令休乘暇
幽尋超然物外髣髴乎日月華君之與遊也

淳祐丁未季秋中澣長洲陳信伯茗溪朱應元以幕
府休暇日自癸水泛舟來遊龍隱流泉怪石天巧地

靈老桂秋薌風清日美人世之仙境也

河內李曾伯長孺同賓客溫陵錢宏聲父清湘趙畚
夫俞仲長沙楊允恭謙仲三山黃應雷叔震眉山楊
挺子西臨川鄧淳德粹衡陽陳彌壽仁父以淳祐庚
戌二月中澣來遊是日久雨初霽風日和美相與煮
泉瀹茗而去曾伯因爲先世遺墨拂塵期而不至者
巴郡稅與權巽父

朱埴侍二親來觀寶祐戊午冬

閩中朱禩孫以景定庚申帥嶺右屬南邊倣擾之後
惟征惟築日不暇給賴朝廷威德年穀屢豐邊鄙不
聳盜賊衰息咸淳初元春誤蒙恩召歸行有日頃客
任忠益楊恪趙與植朱景行闕

文有年胡斗元管炎發蔡文周揆王煥陳埜王
公及來遊男壘侍

古壽呂師夔虞卿以咸淳八年被責牧桂明年夏五
叨召東歸乃率偕行者壽諸石江陵李直清寅之九

江周得一宏英合沙周舜夫景舜古歙方端夫正仲
光山胡文舉公選臨濠孫揚武景武孫振武景文壽
陽楊震孫東叟程遜達伯淮合肥翟國寶君端子元
直元仁元愷元方元哲侍

咸淳壬申嘉平中澣衡山熊桂巖伯闕長沙嚴龕應
之廬陵管浚發季源衡陽尹可繼子善

八桂巖洞爲天下奇觀同谷李興九華章時發臺閭
餘閒躍馬汎舟仰堯山之高挹諸巖之勝時和歲豐

與堯民共擊壤云咸淳甲戌上巳後十日

雨華堂三大字 東平劉無欲書住山僧慧澄刻

世節堂三大字 嘉定八年二月吉莆田方信孺新

桂林西漕臺廳事爲世節堂長沙易祓書扁磨崖於
龍隱巖

谿園居士四篆字吳億書

灘山人曰游觀美而舟輿湊學士集而雕鏤繁終宋
之世騰隱兩巖衣冠填委矣畧覽文字識其名氏不

無先政之思清直如張公田恬澹如李公師中所至
有惠政如苗公時中而余公靖則勲名最優者也抵
掌文菽娛情水石如章太常峴之清思方提刑信孺
之雋賞蓋亦來遊之傑焉而其他聲侔循吏言追有
斐逸在諸書出余覩記之外及未列名茲山者何可
殫舉乃采頌挈歸本傳平儂之碑挂故備矣至若曾
之神道羅之御書並勒巖阿用垂不朽固孝子慈孫
之心然水木非其墓道林壑異夫先祠況衆遊之所

歸豈一姓之獨侈朱得屏於高涼洪遙記於鄱郡米
程寄詠王正功留題乳洞龍隱無與也又元祐黨籍
崇寧獎諭勅書懲既非惡賞亦非功何足視後世乎
陳彌壽撰董公德政碑磨滅過半雖然棠下之思峴
首之淚豈一門生所鍾念哉

屏風山

山形折疊故以屏名去圓通灣不遠灣水紆滴下接
彈丸溪未至灣分道行稍北抵麓又稍東巖門在焉

其門東嚮上高下廣外屬平野野無雜樹彌望皆長
松七星諸峯近在東南蒼翠明滅若涌松濤入巖見
兩壁瑩潔如新琢玉屏不但折疊微似已也深入十
數丈地漸高起又似築臺其上上有石如鐘墮地高
起處有石磴躡盡則天光直射爲後小門范公大成
表以空明又於其外作壺天觀觀久廢遊者憇飲巖
中如在玉壺入右壁上有懸崖可捫以登嘯呼其間
又令人有五城十二樓之想壁左有李彥弼爲程鄰

作建築兗州記故一名程公巖

虞衡志云屏風巖在平地斷山峭壁之下入洞門上
下左右皆高廣百餘丈中有平地可宴百客仰視鍾
乳森然倒垂者甚多躡石蹬五十級有石穴通明透
穴而出則山川城郭恍然無際余因其處作壺天觀
而命其洞曰空明

詩

宋張孝祥 高巖劃天開仄徑通乳穴隈堆青螺髻

嵒嶺白玉闕外有虎豹蹲中恐蛟蜃蟄東縈俯雷電
西出挾日月萬壑來悲風六月不知熱但覺駭心目
未易記筆舌平生山水趣嶺海最奇絕洞府二十四
未厭屐齒折晚乃遊此巖餘地比僕妾同來六七士
嗜好頗相埒舉酒酹山神慰汝久湮滅

梁安世

宣政喜邊功隆允築州縣程公自名巖

闕

記所建得既不償費中興棄不繕誕謾磨崖辭當
日妄誇銜英英石湖仙改作壺天觀壁間之大字莊

重如我弁詩文鸞鶴音筆勢龍蛇孿登高瞰洞戶
水澄如練勝槩出靈臺遐觀起三歎玲瓏二十四妙
墨鐫題徧我來爲拂塵端茲侍顏面邦人頌遺愛壽
骨癯且健今闕麟堂安得使之見

文

宋侯彭老程公巖記 自湘南樓渡重江而東林垌
曠然距水五里有山如屏儼然高峙若環羣峯而主
之其中卷然而虛曠而邃深幽巖天成仙居神護凡

數百步貫徹山之陰高明爽塏下視七星山若導於
前西顧洲渚城邑可以指數蓋龍隱栖霞之所蘊蓄
與夫轉魁傲雲之所鋪寫是皆兼而有之備具衆美
冠於天南雖使造物者更復運意不可增損崇寧之
初鄱陽寶文程公始開是巖方是時桂人樂公之化
而從公之游蓋無日不熙然也咸以程公巖名之遺
愛在人百年之思景物如昔言者墮淚後數年公之
子既來帥桂其忠義文武所以爲國家捍邊而庇其

民者亦如公而年尚壯力方剛福祿功名未易量也
公之盛德可信者如此則是巖託公以久者當與召
友同日而語又非特若羊公之峴山而已昔柳子厚
爲裴中丞記訾家洲其辭瑰怪然徒列遊觀之勝而
是巖也余可以無藉乎

范成大壺天觀銘并序 凡洞穴皆幽闇偈仄秉燭而
遊唯屏風巖高廣壁立如康莊大厦延納暉景內外
昭徹石湖居士名之曰空明之洞繇磴道數十級出

小石穴山川城郭恍然無際乃作觀臺是名壺天游
客詫曰大哉斯壺函裏如許居士曰世所有相如空
浮華心目顛倒

闕

故善巧者能於寶珠及以

芥子乃至毫端出現塵刹彼觀者不覺不知況一壺
哉客悟且笑曰然則游戲神通耶居士亦笑而爲之
銘曰心塵目華三昧現前我提一壺彌羅大千無有
方所四維上下此三昧門溥施遊者

題名

經畧安撫蔡懌樂道提點刑獄尚用之仲明廉訪使者張洵仁仲宣和甲辰八月初八日同遊

桂林巖洞冠天下而此巖最清絕又五嶺之冠也延平鄧公衍彥達宜春藍茁文穎秦臺西門賞進賢平陽丘阡仲通建炎戊申天申節日來遊

經畧安撫建安周與道提點刑獄江東程巨用廉訪使者開封侯晉卿建炎二年十月初五日同遊飯罷乘興遊栖霞洞

許中甫遊慶林來此庚辰六月二十八日題

李似之林德充許師仲兩仲同來乾道丁亥十一月
二十有四日

明年秋七月甲子師仲與二水唐德柄二衢劉公實
復來 後三日再至


經畧安撫使范成大新作壺天觀提點刑獄鄭丙落
其成轉運判官趙善政提點坑冶經畧錢守大正同
集淳熙改元十月十日

夏彥鴻淳熙甲午仲秋題

淳祐丙午復亨之明日永嘉翁安之恭父寶婺章文
之文叔開封劉必聞達可廬陵郭有道景泰左譴忠
父盱江黃應龍正父周子榮景仁縉雲潘景丑孟清
江龍奎沃定同飲餞南海錢益良輔於簪帶亭乃由
栖霞步曾巖登辰山重會於此是月也瑞雪翔空愛
景騰耀羣玉獻狀沃野如繡卷焉良集於是乎書
灘山人曰余從巖壁讀李彥弼兗州記而重有感於

立名之難焉程氏帥桂暴兵竭貲以奉異類外之夸
示州部內自結於君相顯有榮名世載不替宜矣未
幾而貽梁安世之刺其指與宋史符豈漢法所謂附
下罔上懷諛迷國者耶夫既偷取及身之榮又欲規
徼永世之譽假寵文士雕篆名山自以爲計之得李
記豔矣如罔功實何故不敢取載侯語卑卑第爲山
存之至今里人亦無復知有何程公巖者范文穆在
鎮坦示綏裏不矜威畧公府多暇率遊宴水石方赴

桂記驂鸞比去桂入蜀虞衡有志今見傳世間吳則
丹青石湖桂則俎豆名宦不期名而名隨之太史公
曰名不虛立士不虛附茲巖見之矣



桂勝卷二

欽定四庫全書

史部

桂勝卷三

四

詳校官太僕寺少卿臣李廷欽

編修臣程嘉謨覆勘

總校官檢討臣何思鈞

校對官編修臣沈清藻

謄錄監生臣胡容佳

欽定四庫全書

桂勝卷三

疊綵山

明 張鳴鳳 撰

桂城直北重門夾山山分東行曰鎮南歷仙鶴至疊
綵其洞亦以山名一曰風洞洞左小山曰干越其右
小支戟立曰四望唐元常侍晦各有小記鏤於其山
多所發明越亭一詩為茲山麗製至其移鎮浙東戀

戀不忍去見於留別之詠三山蓋常侍之清賞處築
鑿之盛畧具風土記中當揭帝未陸時廣池漸麓茂
樹連山干越四望擁翠而前殘霞斷靄渙漫層崖何
異疊綵然不但石文已也洞後則堯山蔽天而下瀕
江若練南下開鷄目之所遊羣勝交集又四望之下
亂石縱橫枕藉排突半起半伏坡陀隱軫門逕延蔓
亦他山所希有右極城壯蒼翠縣絡下則混沌上則
瞻鶴諸巖互經亦其輔也

風土記云越亭在府城北與壽聖寺接連有巖洞亭
臺高峯碧嶂山穴透出北面因名牖洞遠眺長江
極目煙水北人至此多軫鄉思會昌初前使元常侍
晦奕葉金貂翱翔翰林揚歷臺省性好巖治時恣盤
遊建大八角亭寫其真其院即為寫真院歌臺釣榭
石室蓮池流盃亭花藥院特為絕景於時潞寇初平
四郊無壘公私宴聚較勝爭先美節良辰尋芳選勝
管絃車馬閑隘路隅

虞衡志云疊綵巖在八桂堂後支徑登山大半有洞
曲轉穿出山背

詩

唐桂州刺史兼御史中丞元晦越亭排律 乏才叨
八使徇祿非三顧南服頒詔條東林證迷誤未聞述
職效偶脫囂煩趣激水濬坳塘緣崖欹磴步西巖煥
朝旭深壑囊宿霧顥氣爽衣巾涼颼輕杖屨臨高神
慮寂遠眺川原布孤帆逗汀煙翻鷗集江樹獨探洞

府靜恍若倥傯遇一瞬契真宗百年成妄故孱顏石
戶啟杳靄溪雲度松籟韻宮商鴛鴦勢翔遡津梁危
杓架濟物虛舟渡環流馳羽觴金英妬妝嫵茄吟寒
壘迥鳥噪空山暮悵望麋鹿心低迴車馬路懸冠謝
陶令褫珮懷疏傳遐想蛺纓綏徒慙卽襦袴福盈禍
之倚權勝道所惡何必棲禪闕無言自冥悟

又除浙東留題 紫泥遠自金鑾降朱旆翻馳鏡水

頭陶令風光偏畏夜子牟衰髯暗驚秋西隣月色何

時見南國春光豈再遊莫遣艷歌催醉客不堪回首
翠蛾愁

副使路貫和 謝安致理逾三載黃霸清聲徹九重
猶輟珮環歸鳳闕且將仁政到稽峯林間立馬羅千
騎池上開筵醉一鍾共喜甘棠有新詠獨慙霜鬢又
攀龍

宋朱晞顏前有小序 新安朱晞顏携家訪疊綵巖
登越亭下臨江流清風時至忘其夏日之畏云因書

以紀歲月實紹熙甲寅重五後二十日也

不到越亭久榴花今幾紅江流寒瀉玉
山色翠浮空
百越薰風裏三湘夕照中行藏仗忠信
六合本同風
無名氏題分水嶺微無愁為不負人間
荒徼虛名是
老閒雁迴白日迷千嶺猿叫黃昏隔兩
山閒下剡嗣
吳不知為何人

文

唐元晦疊綵山記

按圖經山以石文橫布彩翠相

間若疊綵然故以為名東至二里許枕壓桂水其西
巖有石門中有石像故曰福庭又門陰構齊雲亭迤在
西北曠視天表想望歸途北人遊此多軫鄉思會昌
三年六月巖功南至曲江上極山林四年七月功既
又干越山記文多剝落不可讀大都記其叔構亭榭
與山名干越之故畧可見者裁數十字曰直渚之北
有虛楹釣榭由此三逕各趨所抵左拍山隈右向之
僧舍為寫真堂北鑿山逕由東崖茅齋經棲真洞而

北史記云秦并諸侯以百越之地為桂林郡吳遣步
騭征南克有干越此後惟有吳都賦字不可讀矣

又四望山小記 山名四望故亭為銷憂亭之前後
綿絡山腹皆逕梁危磴由西而北復東上疊綵右崖
至福庭石門約三十餘步

題名

安南桂管宣慰使馬日溫送馬祭酒上後因遇吳王
三人同遊此洞元和九年春四日題

南豐曾布子宣浦城陳倩君美符離苗時中子居永安劉宗傑唐輔歷陽齊諶子期長興劉誼宜夫元豐二年六月初三日同遊

建安謝勲信都李溫古原田永年淮海楊書思政和三年癸巳二月二十四日遊石門洞

淳熙戊戌春分日桐廬詹儀之體仁與僚屬來遊王

關登史王俊仲瑤周邦弼直卿鄭鄭夢授

開禧丙寅寒食日浚儀趙善恭作繭領兒輩汝洌汝

瀧汝湜汝渲婿武陽謝寧孫鄧友直來遊外甥謝資
鄧筠侍行

吳頴仰方夷吾子容劉孟公來辛未三月丁酉

干越山有唐貞元年間吉州康司士義興房丞江陵
韋隨軍皆以所鐫字滅失其名惟前進士陶立言則
可覩者亦當時來遊之題名也

疊綵山三大篆字又有福真洞三字亦篆書干越山
三字橫列自左而右山下有棲真洞及洞北門共九

大字皆用篆

四望山亦三篆字不著書者姓名然皆元晦時所題

鐫

混沌巖三大字亦篆文

離山人曰諸言疊綵山者一曰桂山以山多產桂又云其山有越王臺一名越王山至問其故則曰五代馬氏以弟實節度桂築臺其間遺址尚在雖然州旣稱桂山悲從之何獨是山得顓桂哉第如所云以多

產桂柰何今寥寥也且疊綵之名元常侍自謂本之
圖經非自唐始何不遵用而必曰桂又馬殷乘亂起
竊據湖南一實何足道顧越王之何其悖哉干越四
望不復為遊人所屬目即越亭亦罕有能道其事豈
非以淶池揚塵雕闌滅迹無從按視與常侍至今七
百有餘歲三山遺刻詞采清蔚可備誦覽者卒莫有
出其上不以屬之反循他稱可乎藉令越王隆臺中
天祇取辱焉惜華景失其巖光亭詠可為寶積發太

息也已

寶積山

夾北城而西是為寶華當山中斷續以雉堞下有重門為西清寶積山自南來交扼其口前巖東向為華景華景之前橫塘深廣晨飄霞綺夕麗金波得水而觀益增故唐元常侍晦建亭一曰巖光以巖拂水而寫光也石屋平敞可視龍隱其後則翠壁上蟠漸至峯首有諸葛祠從北至西城壁峻削皆斬崖為之雖

石頭之險不能過也唐以前謂西阜高起名其地為盤龍岡諸葛之祠無亦因岡名與卧龍微相似耶或曰珠合不識所謂然此五六山峯嶂叅錯北城據之其險亘天而疊綵寶積兩巖洞分布對開其上若北城東西兩翼又皆在城中不獨人士遊賞斯集至於冠蓋往來南北望皇華之清塵申折柳之餘戀非東之疊綵則西之寶積矣

風土記云巖光亭在北羅門外臺亭巖洞亞於越亭

亦是元常侍新置有石碁局爛柯石

虞衡志云華景洞高廣如十間屋洞門亦然

詩

唐元晦 石靜如開鏡山高若聳蓮筍竿抽玉管花
蔓綴金鈿

此詩蓋長律其刻至宋尚在今莫能得惟風土記
存此四句爾

宋呂愿忠 斯洞名華景纍纍乳石懸虛崖疑月窟

絕頂瞰江湍巖底金仙

闕

峯頭玉井蓮地形居衆外

氣象偉無前徙杖觀初日歸輿觸暝煙蔽林排翠幄
封蘚簇花鈿幽致恣清賞鐫題記昔年猿啼聲應谷
雲破月侵筵策蹇追華駟鳴弦拍墜鳶誰人能畫此
為倩老龍眠

張自明 踏破蒼苔覓舊題五言覓得晚唐詩巖光
人憶遺名好華景天開一段奇鐵鎖掣關纏壁壘玉
梯穿路透瑤池古心未展間遊戲慙愧平生華子期

鄭會龍題蔣詩翁故居 詩翁仙去舊壇荒雲滿空

山花自香老盡遊人春不問杜鵑聲裏幾斜陽

文

宋李曾伯紀功碑 寶祐戊午朝廷合二廣創制閩

命曾伯再牧防南鄙也尋調建康都統制朱廣用領
軍來戍於是此諸道戍兵並委之總統相與修浚城
池為保固計是秋敵犯州邑境賴我師遏之不致深
入至明年開慶己未築鑿甫竣邊遽已動七月敵渡

烏泥江八月犯橫山九月二十二日薄我城下韋壁
壘具將士用命一鼓而殪其前鋒遂引退砦於數十
里外我師晝夜攻剗大小十餘捷敵氣頗沮相持
兩旬由間道而湘亟遣兵追襲一捷於黃泥剪其渠
魁俘獲甚衆再捷於衡山刺殺幾盡賊不克逞以遁
陰山極北之衆犯炎方宅南之境偵伺二十年馳騫
數萬里擁衆驅蠻而入乃載籍所未有向非桂林砥柱
其衝師武臣力敵王所愾廣南亦岌岌甚矣此皆宗

社威靈天人祐助億萬載無疆之福也茲制閭結局
都統制且徹戍以歸礮石請紀文武賓校氏名載念
外裔犯順非小變也連年得以固我封守吾民克免
兵難誠同舟共濟者之力矧蒙烱瘴犯霜露備極勞
苦是不可不紀以示永久非示誇詡也提刑提舉兼
叅謀四明豐蒞制機左綿文可嗣眉山家寓河內李
曾伯制議永嘉鄒琳制幹清湘管安昌襄陽李湜盱
江聶世堅合沙卓年龍制僉長沙凌炳炎耒江陳彌

壽括蒼張建大濟南楊延九江劉烈清湘趙龠夫廬
陵朱植會稽陳策制帳都統制長沙朱煥總管峴山
彭興浮光余夢發都梁丘正浮光朱大德壽陽王勝
金陵王達金陵陳邦傑浮光張琦鈴路統制合肥程
俊泗水周旺胡梁李慶山陽楊俊浮光周勝海陵戴
俊戎司屬官浮光吳起宗清原羅萬敬古雲鄭祥

題名

大宋嘉祐三年秋七月安撫兼經畧刑部郎中直昭

文館知桂州蕭固幹臣轉運使金部員外郎王罕師
言因宴北郊語臨桂令梁庚闕菜闕地得一古洞有

刻曰華景其石壁唐桂州刺史御史中丞元晦巖光
亭詩在焉乃會昌五年四月十日題蓋武宗之乙丑
年也其蕪沒則不能審於何時逮今踰百祀也而復
新之於師言且洞無情物爾而得幹臣師言而興生
靈者其興又可詳矣復再踰月十有六日幹臣師言
與提刑屯田郎中宋咸貫之同提刑文思副使王琚

彥溫鈐轄供備庫使李繼明嗣昌通判屯田員外郎
周約中立復遊於是貫之因本所以然而書其崖云
提點刑獄李師中前瓊守謝鴻郡丞黃照幕下孟庭
堅段惟修周仝會此巖下嘉祐辛丑正月十九日

兵馬都監閩紳君儀筦界巡檢劉永世延之知興安
縣卞玄冲道淵熙寧甲戌孟冬初六日會此

似渠景淵令升少隱公弼同來紹興五年閏二月初
十日

嘉定癸酉長至前四日方孚若邀管定夫陳膚仲來
觀膚仲書榕臺二字贈主人使鑱之

嘉定七年夏五江西張自明與定武趙蔚來遊

寶積山三篆字在今傍山居者屋後石壁因言壁側
有呂公巖榕臺亦在其地

灘山人曰山故有元在菴主居自為歌述元在之意
皆西方餘論流入中土者所演說例不采錄又蔣詩
翁亦卜築其間名氏旣滅文字並亡夫蘭可折而薰

不可奪故焚之而香生玉可碎而光不可蝕故磨之
而彩映蔣翁誠深於詩乎金膏玉液與寶積不毀可
也李所詠雲非指本山張詩自恕袁宋反笑晚唐何
其謬也顧不視李刊去之得無以巖光存哉紀功碑
文非孟堅功異車騎且與寶積不相涉槩當黜之然
北兵深入遠窺南徼自天地剖判所未有之事其變
非常存以詔來毋忽遠憂焉寶華伊邇胡李兩公築
城浚隍圖狀具在雖章時發記漫滅不可讀且摹且

抄藏故府非識微者所深念乎桂嶺乃在臨賀彼中自昔有桂嶺縣與寶積前小坡何豫宋令甲府帥監司度嶺得任子厥後以道不經彼尋削斯賞呂源何為鐫石坡上罔主聽而市倖賞其大節可徵已如曰不然請視范公成大駟鸞錄

隱山 潛洞山 西山

隱山當夾山之南口潛洞出其東北西山屏其西南小於諸山若亂石疊盤北高南下似無奇峯秀壁眩

目驚心惟中有六洞洞皆有水不異鑿出上浮水際
唐李公渤名其洞之水曰蒙泉疏泉出山名之曰蒙
溪諸洞之名各有三隸書曰朝陽夕陽南華北牖白
雀嘉蓮疑即渤筆宋人云北牖有渤題名今不知所
在亭榭湖水之盛具吳韋記中宋則張公維大為修
浚拓湖至潛洞洞門今尚有刻多紀其事洞前後兩
門可通出入潛有南北之號或因之西山迤邐兩峯
夾道上至高處環桂山水其勝溢皆故唐人於此登

高禪刹道觀爭據兩崖崖鑿佛像僅餘金碧若乃樓閣塵銷文子露立鳥啼荒塚草蔓石堦雖足俯視兩山然積廢太甚不可復支矣

風土記云隱山本名盤龍岡在府西郭三里與延齡寺相近寶厯年前使李給事渤開置亭臺種植花木有池沼巨巖水深無際有嘉蓮白雀諸洞有慶雲亭在山頂有朝陽亭夕陽亭連理橘山河秀異皆入畫圖作屏障為信好之珍有從事皇甫湜吳武陵撰碑

碣三給事徵起山中後為考功郎宰相皆書下考以
天子巡遊蹂踐禾稼無所獻替故也及除桂林有嘆
鴈詩曰三朝四黜倦遐征往復皆愁萬里程爾解分
飛却回去我方從此向南行蓋嘆其不復堪遠出云
虞衡志云隱山六洞皆在西湖之上泛湖泊舟自西
北登山先至南華出洞而西至夕陽洞窮有石門可
出至北牖穴口隘狹側身入有穴通嘉蓮西湖之外
既有四山巉巖碧玉千峯倒影水面固已奇絕而湖

心又浸陰山諸洞之外別有奇峯繪畫所不及荷花
時有泛舟故事勝賞甲於東南

詩

唐李渤留別隱山 如雲不厭蒼梧遠似鴈逢春又
北飛惟有隱山溪上月他時相望兩依依

宋孫抗朝陽洞 險絕信天開春蘿蔭古苔不愁雲
影閉先得日光來片石充碁局涼坡遞酒盃東風偏
著意草木爛成堆

呂愿忠 半世觀山鬢已皤欲求釣艇老漁蓑杖藜
又過煙霞洞聞說當年爛斧柯

朱晞顏 湖上初驚八月秋嶺頭又見桂香浮巾車
幾憶陶彭澤竹馬多慙郭細侯未遣林泉還舊隱且
同巖壑訪真遊一枰勝負人何在試問樵柯已爛不
孫抗南華洞 峭徑入蒼煙他山盡一拳上盤朱鳥
翼中寓漆園仙清可攜壺賞涼堪拂石眠九疑生接
境曾此按薰絃

呂愿忠 亂崖深峭水淙幽六夏來遊儼似秋安得
蘧蘧一覺夢倚巖栩栩訪莊周

孫抗夕陽洞 塵寰雖未遠顥氣覺偏滋日落鳥歸
處秋高風勁時吟餘下天籟坐久凜冰肌信是栖幽
境涼蟾照履綦

呂愿忠 怪底浮屠不宿禿直搜巖竇意徜徉洞中
日月未嘗老何事仙家有夕陽

孫抗北牖洞 舊駐東方騎因題北牖名來須風作

御去認斗為城日氣晚方到雲收寒易生予心匪游
行拱北振華纓

呂愿忠 南窓聊寄傲北牖有涼風巖洞幽深處結
茆容老翁

李曾伯 河內李曾伯再來牧桂之明年實開慶改
元上命三衢柴士表視邊隘竣事將還夏六月二十
一日約憲倉四明豐蒞兵帥浮光朱廣用符離朱煥
載酒千山觀訪招隱過仙奕感今懷昔風物固亡恙

也時火傘張空水花蘸碧相與徜徉其間清不受暑
因得四十字并識諸石

自重來嶺嶠豈暇訪湖山緹騎行邊了戎旗護戍閒
相看羣玉外一笑六郎間回首西風靜何愁老漢關
豐蔭閭相可翁先生偕王人有湖山遊獲侍坐先
生有詩輒用韻

西郊陪袞繡雲步入千山行樂五星聚浮生半日間
尋棋楓葉下載酒藕花間譚笑長城在何人敢度關

孫抗白雀洞 禽貴羽毛潔地憐巖壑幽名非華陰
凍景似秀林秋不覩書塵繼空驚歲月道何如潁川
鳳千古冠綬油

呂愿忠 洞中石燕說長生白雀何因浪得名無限
好山難買得世間奚用孔方兄

孫抗嘉蓮洞 地應連海眼終古蓄寒泉四列青蒼
壁雙開齒菑蓮已嗟真賞去猶訝昔香傳未愧東林
下霜葩社衆賢

呂愿忠 羃羃煙雲鎖洞關旁開六戶類連環芙蓉
未是仙家瑞更約同登太華山

文

唐吳武陵新開隱山記 入則維化出則寧物物寧
而後志適乃有西垞之賞始一日命騎西出出門里
餘得小山山下得伏流顧曰石秀水清葱葱乎其韜
怪物耶乃釋騎蹈履北上四十餘步得石門左右劍
立矍然若神物持之自石門西行十步得北洞耽平

如室室內清縹若繪積乳旁溜凝如壯士上負橫石
奮怒若活乘高西上有石窓櫺窓下望千山如指自
石室東迴三步得石巖巖下有水泓然疑虬螭之所
宅水色黑綠其濬三丈載舟千石舟可坐數十人羅
絲竹歌舞飄然若乘仙巖之南壁有石磴可列樂工
十六人其東若畎澮貫石流去不知所止北壁半穴
如懸門徹外容小舟出門有潭袤三十步潭有芰荷
潭北十步得溪溪橫五里徑二百步可以走方舟可

以汎畫鷁渺然有江海趣魚龍澆澍鷗鷺如豢自溪
潭之間有地丈餘其色正赤厯石門東南越小嶺石
林危嶠夾聳左右自嶺下十步得東巖自巖口直下
二十步有水濶三尺許淺沙若畫細草如織南望有
結乳如薰籠其白擁雪自巖西南上陟飛梯四十級
有碧石盆二乳竇滴下可以酌飲又梯九級得白石
盆盆色如玉盆間有水無源香甘自然可以飲十人
不竭還自石盆東北上又陟飛梯十二級得石堂足

坐二十人乳穗駢垂擊之鏗然金玉聲堂間有石方
如碁局即界之以奕翛然不知柯之爛矣自堂北出
四步直西二筵南入小峽得內洞東有石室如畫頂
上方井弱翠輕綠便如藻綉自洞南下仰矚東崖有
凝乳如樓如閣如人形如獸狀闐然不知造物之所
變化也自樓閣斗下七步次石渠渠深七十尺渠上
為梁曲折繚繞三百步遠日月所不能燭矣左右列
炬而後敢進自梁直南抵絕壁斗下為飛梯飛梯九

盤而後及水水北涯有石閣峭甚綴以欄檻適可宴
息水通魚船東出朝陽四隅黝黑方谷如鑿以石下
投波聲響山寒氣薄人往往畏恐自石閣還上絕壁
西去十步又得小洞俯行三十步左右壁有鍾乳或
垂或滴其極有石室正如禪庵多白蝙蝠出小洞北
上二十步又得外洞石色猶四洞東西壁下有石數
十枚其面砥平間有凹罇琴薦厥狀甚怪游人列坐
肅若冰霰其東有便房桁櫨拱棧支撐環合猶鬼工

之椎琢也洞北七步臨西石門石門西去三十九步
得西洞洞深九十尺北崖有道可容一軌崖南有水
水容若鏡纖鱗微甲悉可數識東過小石門門東頗
行三十步詰屈幽邃道絕窮崖又寬明置水閣崖下
閣勝九人閣下水濶三十尺伏流崖南亦達朝陽自
西洞口南去一矢得南洞洞西壁可譙數十人其東
有水輕風徐來微波蕩漾琴高遇之當不返矣北上
山頂盤曲五百步石狀如牛如馬如熊如羆劍者鼓

者笙竽者塤箎者不可名狀石路四周而松蘿萃于西北公曰茲山之始與天地並而無能知者揭於人寰淪夫翳薈又將與天地終豈不以其內妍而外朴耶君子所以進夫心達也吾又舍去是竟不得知于人矣乃伐棘導泉目山曰隱山泉曰蒙泉溪曰蒙溪潭曰金龜洞曰北牖曰朝陽曰南華曰夕陽曰雲戶曰白蝙蝠嘉蓮生曰嘉蓮白雀來曰白雀石渠寒深若蟠蛟蜃特曰蛟渠或取其方或因其瑞幾焯于圖

謀也於是節稍廩儲羨積度材育功為亭於山頂不
采不斲倏然而成憑軒四望目極千里高禽驚獸蛟
翔蟻走恍然令人心欲狂又作亭于北牖之北夾溪
潭之間軒然鵬飛闕若虹據左右翼為廚為廊為歌
臺為舞榭環闕樹負脫翬滓邦人士女咸取宴適

或景晴氣和蕭然獨往聽詞于其下嗟乎我俗既同
我風既調茲亭茲山又與人物共之則不知古之甘
棠其類是耶他日會新亭之下辱命紀事奉筆遽題

於北榮曰成紀公字濬之不名重也內吾為伊周外
吾為方召疏山發隱也決泉啟蒙也作亭子來也三
者其異乎四賢之志乎不異也故書

韋宗卿隱山六洞記 天作南北星斗辨之地分方

夏山川間之其土殊其鎮異故磅礴博厚隱嶙鬱律
連岡走峰千里一息秦之山也發地干霄上為嵯峨
攢空交映積為窟嶺越之山也桂林郡郭千巖競秀
世情賤目俗態無心故茲山接城郭之間億萬斯年

石不能言人未稱焉寶歷元紀給事中隴西李公以
直諫匡主圖贊國政時未及泰人安得寧公辭帝鄉
白雲為越嶺時雨六條絃布百城震肅人既安年既
豐羽扇空搖鈴閣不引盼羣山而獨往興發得絕境
而素尚心來茲山在焉且謚為隱若夫地因人弘山
自人顯故有巖結太素至說稱傳谷闢洪荒及超號
張我得茲山以隱名彰爾其為狀也左扼郡城之固
右對招提之刹前虛明而散祝融之火後清泚而壓

玄武之水外孤峰而競秀中六洞而潛通諒仁知之
所樂信靈仙之所宅登山自西舉趾維左首至於南
華洞洞中水長十餘步濶不可踰深莫之測澄為靈泉
播為陽江水側平坦可坐數十人自南華洞西轉五
十步至夕陽洞洞長數十丈其旁有水與洞終始在
水之東高下有石如砥如礪十數人可憩洞窮有石
大高可跋及廣不盈尺鑿穴而望復使下尋有潭東
去莫究深廣又北轉而東八十步至于石門自石門

又東北十五步至北牖洞洞虛潭幽其水潑墨中有
巨魚可三四尺鏤鱗鎗甲朱鬣赭尾人或見者龍以
敬之潭之左右怪石萬狀如鳥斯飛如虎斯蹲如衣
裳發笥如龍蛇出奔乳竇懸玉石壁流雲潭之南有
石室深有便房高有石窓追琢不如清瑩可愛又東
南轉山一十步至朝陽洞洞中有水傍浸潭側長可
數十步三洞之水周圍相通亂于池入于江水中有
石高可三尺其色白其容光圓如薰籠大如匡牀以

其水浸于潭側故曰側潭尋側潭之西數十步止有

潛洞歷

闕

可至窈窕深之羽人來謁却上南壁約六

七丈有雙碧石盆懸于半壁容各數升其上尋尺有

一白石盆常有水升餘酌之不竭味甘如醴色白疑

乳煎以病愈飲以顏駐其側可坐五六人左右石壁

皆光滑密緻有如

闕

凝綿絮却下從洞口北

闕

路絕越顯

闕

梯架空得至雲戶戶內博

闕

傍透虛明洪纖可鑒有石若榻勒為棋局

對以手談局之左右可以偃仰闕於斯闕於斯賓從

徒侶各有攸處闕諸闕戶

外有二徑其一直上闕處也桂江屬望

縈闕如黛寸眸千里周覽一息

構亭其處以俟登臨是歲孟秋月慶雲見於西方自

邠及闕南北極望闕狀競變五色相鮮州吏為圖以

獻之公允而不阻既而亭構因目之為卿雲亭自亭

却下至南華洞口又一徑西去十餘步至白雀洞郡

人有獲白雀來獻者雪毛霜羽頰紫紅趾且旌雀瑞
因志洞名洞口隘狹側身稍通摩臍夾耳可以方之
漸下十餘步其右有立石望之如人次有石堂光滑
寬敞人或宴息可容數十從此更下有玄潭其深莫
測潭東西巖上有一石樓高低可二三尺自下而望
如酥點成樓南有二石相去纔數尺被服如人狀意
若就樓而看者玄潭泓澄水色如墨見者神竦方暑
生寒乃作閣道架潭瞬息疾過西南透于石穴中石

穴路右復有乳槌亦如朝陽洞者視其周圍但微小爾愛其光潤則或逾之洞內有穴通嘉蓮洞初嘉蓮洞開而未得其號會有獻同心蓮者遂紀事而名之從洞北出六十步西去有洞其深不測中路多白蝙蝠飛舞在空從東有穴棧閣盤迴却透玄潭之北有兩穴東穴透明長可數丈人不可過莫能究之西穴出於洞口洞內平坦石榻縱橫湯茗在茲笙竽以間有石琴薦宜以撫絃聲越金石自洞西去至夕陽出

西山復入窠六洞之能事畢矣目諸水隱山下池謚
曰蒙泉派合成流水源有二其一源自夕陽注嘉蓮
經白雀厯朝陽傍浸北牖出於南華流汴積為池其
一源自蒙溪源在北牖洞東北里餘出於北山自山
南流會於南華洞水合而成池池因山麓不資人力
高深向背繚繞縈迴五六里間方舟蕩漾靡微風鏡
清波棹女唱榜人歌羽族載依鳬鷺翔泳鱗介是宅
魚鼈噉喁野花依藂遊絲轉空蘋末風清荷底水紅

莫者取饑者採與人同利恨斯池之不大也招提之
南長松夾路濃陰閉日韻響含秋外有連理松異本
同幹內有偃蓋松低枝覆空為寺之光華作山之粉
澤松側有竹黃緣盡岸策杖未窮步履猶遠北牖洞
口有閒田砥平南北十餘步東西稱是可以施欄檻
為戰酒之塲可以構簷楹為更衣之所乃作水閣立
風廊闢厨戶列便房華而不逾儉而不偏面茲池以
滉漾對他山之青翠絲竹競藝賓僚滿觴歌聲遏雲

舞影臨水取樂今日鄉心慙忘客有中席而言曰夫
時景賞樂四者難備東西南北百年不間既別而復
會茲山悵懷而未卜他日請執筆紀大賢獨得之勝
并立碣垂隱山六洞之由匪曰為文且示來者

宋卦德亭銘有序 卦德之亭八觚括蒼管湛營之
長樂陳孔碩名之既而復銘之曰

天地山澤雷風水火既畫既分有萬斯夥萬殊一實
皆備於我八司厥位一常主中若樞得環以應無窮

流形相擅自我陶鎔我坐斯亭洞然八極卷舒晦明
一出入息八者旁羅吾見其一

題名

治平元年仲冬十八日同魯國長源吳興彥聖遊鴈

門質夫因題於洞之左崖

以下
原闕

欽定四庫全書

卷三

淳熙壬寅六月二十日四明王正己伯仁夫攜孥來遊

桐廬詹儀之以寒食休務約郡丞陳昭嗣李晉帥屬周環滕瑱唐廷堅葉子義郡文學陳邕蚤飯榕溪閣觀青帶甘棠橋歷覽西湖六洞之勝時膏雨初霽風日融怡流峙動植觸目會心分韻賦詩薄暮而返淳熙十四年二月戊子

淳熙丁未七月下澣詹體仁王仲寅孫稽仲觀稼城

西小酌招隱亭亭蓋體仁將漕時所建俯仰十年感慨賦詩近暮乃還

北巖劉愈晞韓以孟冬初斡約建安雷霆復之桂陽姚宋佐輔之禾川劉伯源慶長金華徐由己克仁號畧楊芳懷英圯上邵康年仲安長沙曾倫長卿安成彭世亨元泰探勝湖上屬時久晴風景怡暢崇崖巨壑萬狀畢陳泛澄升高窮所未到相羊周覽改席精廬清興有餘盃行無筭竟夕乃還實淳熙丁未歲也

嘉泰元年秋七月二日溫陵趙庚西叔徐伯嵩高叟
陳煇君顯陳次山景甫延平廖視明甫李之有叔則
鍾安老定叟三山王復古興周黃士特仲誼莆陽傅
誠至叔顧棹章叔葉元澤季成臨汀吳雄夢錫建安
劉學裘傳之同遊

經畧安撫使莆陽蔡戡定夫提點刑獄公事延平廖
瓌季碩轉運判官長沙吳獵德夫嘉泰三年重九日
同遊

計使括蒼管定夫帥守鉅野李誠之後先來桂且久
未嘗一武西湖巖洞壬申初伏始獲遊覽自資慶腰
輿上千山觀憇西峯中峯隱山煮茗談方外移時泛
舟訪招隱巖竇幽邃奇石森列湖光瀲灩雲錦帶映
誠可賞已而雷聲殷空雲頭俄興涼雨飄灑四顧田
野綠穰濯濯 下文皆闕

嘉定壬申六月下澣括蒼管湛攜家登千山觀泛西
湖

方孚若侍親婁遊嘉定癸酉

荷花鏡香鼓棹觴吟依約杭湖白蘓如在蒼崖玉立
澄潭環馬枕漱其間又令人有蓬瀛想贛曾原一盱
周子榮汴趙希囿時鏢洪范得輿淳祐十年夏五月
招隱山三大篆書

隱山二大篆書

北牖洞三大篆書

招隱二真書

潛洞

虞衡志云南潛洞在西湖中羅家山上北潛洞中有
石室石臺石果之屬

宋劉穎西湖再開呈張經畧 持節南來竦百城就
分帥閫握邊兵盡令殊俗窺風采更許佳山託姓名
峴首要須刊偉蹟習池底事著狂生風流人物今宗
主物物俱蒙不朽榮

張維和 不賢邨得似長城偶向潢池盜弄兵靜沼

何妨無事飲幽尋
聊記所居名千山
倒影湖新復兩
洞潛珍景旋生
紀事還須武陵
筆亭成唯擬
看題榮
滕廡和 隱然重望壓邊城
號令風行玉帳兵
詩思江山真得助
威聲草木盡知名
要令萬頃窺黃憲
不把千畦付麴生
坐使勝游還舊觀
追隨那得勝公榮
文

宋張維開潛洞記
乾道四年春正月浚西湖秋七月開潛洞
明年春二月疏鑿李蹊一百六十步有畸

可通畫鷁而洞山宛在水中矣疏鑿之力汲郡袁進
平原聶倫東明石良弼競率所部不日成之延平張
維識於洞濱之石同里曹總書

鮑同復西湖記 桂林西湖今經畧使徽猷張公所
復也舊曰蒙溪去城里餘而近勝槩為一郡甲按唐
吳武陵隱山記韋宗卿六洞記皆述溪潭可以方泳
然歲久廢為田尚可考者特一潭二池池有芰荷廣
不踰尋丈餘盡耕稼之壠矣初公遊山中得二記按

之以求後讀吳記至走方舟泛畫鷁渺然有江湖趣
則嘆曰鬱茲觀美可謂殺風景者矣遂已默記厥由
居山之麓衆泉所會中偃而四穹茲蓋天成第流泉
使之不得去則湖可坐而復乃相所從泄作斗門以
閘之未幾水遂盈衍澶漫若潭若池橫徑將數十畝
望之蒼茫皎澈千峯影落霽色秋清景物輝煌轉盼
若新然吳記以為溪而云作亭牖北夾溪潭之間韋
記以為池而云北牖洞口有田砥平可施欄檻以知

昔時猶有淺陸水所不及之處而今洪深之滙矣其中流平沙隆出波面如島嶼因築亭其上命之曰瀛洲植卉藝竹映帶遠近南閘招提西隱山為亭每遊覽則憶家山因命之曰懷歸北依茂林俯流為閣用老杜湖水林風之句命之曰湘清放船集賢于是乎在環山循趾引水䟽渠繚繞縈迴索奇討幽得新洞二命曰北潛南潛又為亭於其陽直西命之曰望崑是皆出乎六洞之外發前人之遺逸增往牒之未載

遂使西湖勝槩脩然如立塵寰之表江浙雖稱亦未能遠過焉

侯德亭記

嘉定甲戌中夏管定夫新作小亭於潛

洞之口於是映帶遠近洞以增邃初伏後一日期方孚若陳膚仲來觀叅坐洞中酌酒數行颯然秋也主人曰亭宜何名有客曰昌黎公以侯德名丘謂蔽於古而顯於今有侯德之道與此同意借以名亭可乎咸曰然遂書諸石

題名

王壽卿姚同卿張子貞子斐黃德制田子謩王儀之
滕子正乾道己丑中元日遊

淳熙辛丑夏六月望天台王清叔約客於西湖之上
程伯莊徐商老張明仲劉傳朋張子真李伯寅魏熏
夫王詠之凡八人於時背夏涉秋老火益壯縈舟叢
薄少憇是間觴行笑歌聲動巖谷夕景西下冷風襲
人殊不知有暑氣茲遊甚樂書以記時

潛洞二篆字

西山

風土記云延齡寺聖像在西山前近隱山舊號西慶
林寺武宗廢毀宣宗再崇峯巒互張雲木交映為一
府勝遊之所寺有古像徵於碑碣蓋廬舍那佛之所
報身也

詩

唐戎昱桂州西山登高上陸大夫 登高上山高

處更堪愁野菊他鄉酒蘆花滿眼秋風烟連楚郡兄
弟客荊州早晚朝天去親隨定遠侯

宋折彥質超然亭 超然亭上鬢毛斑浩蕩秋風小
立間豈為詩情堪過海祇緣脚力要尋山峭峰斷續
天容缺高壘縈紆地勢慳回首不堪東北望桂林萬
里是秦關

張栻和友人夢遊西山 故人疇昔隱西峰野寺幽
房一徑通無復老僧談舊事空餘修竹滿清風夢中

尋勝忘南北句裏論心豈異同我欲壁間題唱和他
年留得詫南公

方信孺鑿池種白蓮作池開新白徧天涯未許東

風擅一家蒼桂叢中蒼桂樹碧蓮峰裏碧蓮花波光

分破湖千頃

闕

影斜飛水一窪待著闌干橫淺綠浮

萍開處見魚蝦

又詠海棠真珠幾顆最深紅點綴偏芳造化功好

事何年移蜀種美人清曉出吳宮妖嬈能得幾時賞

零落纔消一夜風
自有生香人不識
繡衾全覆錦薰籠

魯宏正 足倦尚躋攀
南來第一山撐空
列岫聳拂閣聳
孱顏莫作炎山看
渾疑鴈蕩間
輸他癡衲子終
老白雲關

臨江魯宏正淳祐癸卯暮春題崖

李曾伯 玉筍環星拱
青螺帶霧披
山為天

以下
原闕

欽定四庫全書

杜勝

天

桂之林蒼梧之野觀此瑞文如符所兆之語即以碧
桂山林名之山人倦於游蓋將遯世願奉母慈持妻
子遂與隱者淪朝夕於此山中庶幾再遇瑞石以獻
之於明天子顧不休哉於乎陵遷谷化今昔一揆為
湖為田等歸耳千載悠悠可以圖山林於茲敝舍乃
為銘曰碧桂之東有斗其峯有金其壟氣佳哉鬱蔥
碧桂之西峯房蟻嶼爾蠻爾夷化劍刀鉏犁碧桂之
南大海天涵維崖維簷一王仁是覃碧桂之北萬仞

壁立不騫不泐聖人壽與匹其中盤盤我居之安有
泉水可汲有烟霞可餐援素琴而彈流水高山知音
孔艱吾與子俱還嘉定八年正月朔紫帽山人方
信孺述丹霞子張自明立石

方信孺既自銘其碧桂山林又為張自明作碧瑤壇
銘并序紫帽山人既作碧桂山林丹霞子又於其
絕頂以為碧瑤壇挾竒剔秘於斯紫帽山人為之銘
曰碧桂之阿闕

嵯峨有方者壇仍此坡陁如踞虎

豹如駕黿鼉或坐而奕或倚而哦布席而飲植杖而
歌上天星辰大地山河伊俯仰間可蹴可摩安期羨
門騎氣相過笑傲今古等一刹那忽來不速款我松
蘿彼何人斯山靈所呵

題名

假守張莊禱雨茲山

闕

大觀

闕

年

闕

月

闕

曰

轉運副使權經畧安撫陳仲宜道夫提點刑獄唐最

夢傳提舉常平陳中復從道走馬承受陳昉明遠同
遊西山飲于觀音院登西峰閣啜茶盤桓抵暮而歸
政和改元仲冬癸亥轉運判官唐懋晉德題

莆田李子凝紹熙五年嘗陪漕運方公東遊巖竇西
泛湖山來一寓目後餘二十年東閣檢詳輶車游至
因簡後塵千山爽氣且復挹致闕裝東歸焉嘉

定甲戌重九日書

河內李曾伯長孺領客胡實端甫李廷龍東甫管安

昌順甫周應和同甫同來弟李仕教忠子杓侄根侍
淳祐庚戌四月之十日

咸淳甲戌四月初六日憲倉九華章時發帥守同谷
李興聯車遊西湖登千山觀憇雲戶洞曠望幽尋景
趣兩得 此下文闕

千山觀三大字 嘉定五年李曾伯書

澌山人曰復湖之事殆難言哉田既負郭又便引水
公賦所入已有定額興大役以市衆怨不免移此攤

彼償所損賦其山雖潤其民則賴所謂玩細娛而不
圖大患者得無近之耶於李公時為沮洳荏葦之區
穿泉築室植菱芰於其中且答民勞兼暢羈思時哉
時哉南宋時李神州化為異域北馬牧於江壩茲何
時也洒新亭之淚猶以為恥况可慕錢塘之湖窮財
力於此哉臣主同樂鮮有競志尤之效矣亂何濟乎
及至咸淳甲戌宋歷告訖近在兩歲無問愚智戶知
其然乃章時發李興龍隱紀遊則曰時和歲豐與堯

民共擊壤於西湖登千山憇雲戶又曰曠望幽尋景
趣兩得何其酣昏若此甚也衝梯未及桂輿先委城
而遁馬公墜義激代之死守不國之憂而禍是樂其
罪烏可數哉善乎蟋蟀之詩曰今我不樂日月其除
言行樂貴及時也又曰無已太康職思其居言好樂
當無荒也余竊誦是以為議復湖者規焉

中隱山

山去西城四五里至則小溪淺碧可踐而過循麓入

巖巖有三重其下附地者最為廣平上漸束削然戴履純石瑩然朗淨無復下方埃壘之狀陟第三重倚牖而望若遊目天表暝烟歸鳥似從下飛侯山返照入巖轉光風自西來薄巖拂樹與東麓僧菴鐘磬相和炊烟縷縷起叢薄間遙聞餘響微似犬吠僧云此去木林不遠木林即其旁地名居人頗衆中隱一作鍾隱土人曰佛子巖以宋乾道間建有福緣寺為僧祖華所居故名之寺廢已久惟東小菴其地陋院不

足騁目乃三巖下鐫有張公洞三大篆書又其先有稱呂公巖各具爾時所為序記中之呂之張不知誰屬乃中隱則其昔名焉

虞衡志云佛子巖亦名鍾隱巖去城十里號最遠一山岑起莽蒼中山腰有上中下三洞最廣中洞明敞高百許丈上洞差窄一小寺就洞中結架因石屋為堂室

詩

宋呂愿忠滴護田綠水轉山樊 翠羣峰列巨杉洞
外僧藍侵斗漢澗邊人跡隔仙凡深深雲谷春常在
寂寂松扉夜不緘此處得名爰自我要須題作呂公
巖

假守呂叔恭遊中隱巖無名洞坐客鄱陽朱國輔
云此洞未有名因公而題欲名曰呂公巖予未敢
披襟而劉子思陳朝彥皆曰甚當戲書五十六字
鐫於石壁間紹興甲戌季春七日

又坎止流行但信緣嶠南風景異山川偶因乘興
穿山腹始悟壺中別有天

假守睢陽呂愿忠叔恭機宜祥符劉襄子思通守
鄱陽朱良弼國輔經屬建安陳廷傑朝彥因祈晴
設伊蒲塞饌於西山寺飯已乘興遊中隱巖不期
而集嘆巖竇之奇恍然別是一山川留題以記勝
遊叔恭之子大鈞侍紹興甲戌季春七日

張維題張公洞年來行樂與民同探穴追踪太史

公幽洞初開名易著蒼崖新刻句難工風驅俗駕松
扉外雲鎖仙丹石室中付與山僧司管鑰勿教勝地
草蒙茷

文

宋張維張公洞記 環桂之郊巖洞二十有一皆人
跡所至者獨佛巖之下有洞焉虛明而邃幽過之者
弗顧豈遊人慕佛巖而來窮其足力興盡則汲汲而
去雖欲一顧有所不暇耶抑視之如苦李以為不足

嗜耶乾道元年予承乏按刑嘗同張使君紫薇公幽
尋得之相語曰斯洞蔽於今日吾人始發盍亭於洞
前俾來遊者指為張公洞可乎明年使君去予實繼
之又明年治中從事因人心之去思也於是大書以
表之十二月乙卯延平張維記同里曹總書

題名

元豐二年八月十八日劉宜父曾公冕苗永孺僧紹
簡遊

括蒼管定夫莆陽方孚若長樂陳膚仲嘉定癸酉先
重陽一日來遊

詩境癸酉三月三日遊 詩境即方孚若之別號

蕭子敬向伯大王德強呂叔舉鍾德元張聖泳鍾長
卿王必大端平丙申下元前二日來遊

長沙鍾春伯豫章范旂叟端平丙申歲十月既望前
三日同遊

臨川羅愚淳祐辛丑中伏日約曹伯虎聶世用梁价

魏牧楊義仲趙時頌陳噲汪知幾翁崇櫚觀稼西郊
至呂公巖泛舟覽湖山之勝觀石湖南軒諸賢題字
時雨初霽涼風先秋穡事可期因志其喜

陳鐸叔振周子榮景仁范得輿民載趙孟邁君啟淳
祐辛亥前立春二日同遊

巖有篆書張公洞三字

灘山人曰余觀福緣寺記見三四先政丹青重巖藻
黼衆壑不遺餘力矣其畧曰府判汪公新興精字經

畧戶部呂公建三門齋廳大帥紫薇張公勗山亭於
巖右經畧徽猷張公植壽松五百餘本以陰巖居諸
所增飾一何盛也之數公者豈直徼福於浮屠氏哉
無亦以虛巖沓出麗若重樓近桂四野可俯而窺為
西郊登眺之最其時山僧若祖華之屬頗任住持即
是記撰者日登書者惠通雖於文義不甚嫻雅然差
愈後來目不識書口不持誦彼教所謂白跼者士大
夫庸奴遇之爾誰其任以住山哉往見廬山紀事江

都桑君喬於其名刹多慨諸僧不追先軌致勝地因
之榛莽吁豈獨廬阜為然哉余於吾桂諸山亦云

桂勝卷三